

समे – 12:25 hrs.

<><><><><><>

Amarnath-Yatra

3 जून थवा शुरु होने आहली श्री अमरनाथ दी जी यात्रा दी तयारियां जम्मू कश्मीर च पूरेजोरे शोरें कन्ने जारी न। प्रशासन आस्सेआ इस यात्रा गी सुचारु बनाने लेई जतन कीते जा'रदे न। इस सरबंधी च केंद्री गृह सचिव गोविंद मोहन होरें औंदी श्री अमरनाथ जी दी यात्रा दी सुरक्षा सरबंधी तैयारिएं दा इक उच्च सतह दी बैठक दौरान जायजा लैता। एह बैठक श्रीनगर पुलस मुख्यालय च होई जेदे च प्रदेश दे मुख्ख सचिव, डीजीपी, सेना, खुफिया एजेंसिएं दे वरिष्ठ अधिकारी ते होर सरबंधी अफसर शामिल होए। बैठक दा मकसद यात्रा लेई सुरक्षा ते तैयारिएं सरबंधी कार्य योजना गी मुकदा रूप देना हा। वरिष्ठ अधिकारिएं योजना गी बड़े ध्यानै कन्ने ते सौहगा होइए तैयार करने दी जरूरता पर जोर पाया तां जे पैदा होई सकने आहली कुसै बी चुनौती कन्ने निब्बड़ेआ जाई सकै। सब्बनें सरबंधी एजेंसिएं पर नेइमां तालमेल बनाइए कम्म करने लेई आखेआ गोआ।

<><><><><><>

Satish

ढांचागत विकास ते सामुदायिक कल्याण कन्ने जुड़े दे कम्मै गी रफतार देने दे मकसद कन्ने ट्रांसपोर्ट मंत्री सतीश शर्मा होरें PMGSY ते PWD स्कीमें तैहत अखनूर च शिड़क पर लुक्क पाने आहले कम्मै गी शुरु करोआया। चौकी चौरा थवां Ghar Majoor ते Panya थवां Bindigala तगर शिड़कें गी ठीक कीता जा'रदा ऐ। मंत्री होरें बन्ने पर हाल च होई दी गोलाबारी करी प्रभावित परोआरें च मुफ्त राशन बी बंडेआ। मंत्री होरें बोर्ड म्तेहान च 90 फीसद थवां बद्द अंक लैने आहले विद्यार्थिएं गी सम्मानित बी कीता।

<><><><><><>

Reasi-Smile

हाशिये पर रौहने आहले लोकें दे सशक्तिकरण दी दिशा च इक बड्डी गेंs दे तौरा पर जम्मू-कश्मीर च स्माइल योजना गी लागू करने आहला रियासी जिला श्रीनगर दे मगरा दुई थाहरा पर ऐ। समाजी न्याs ते सशक्तिकरण मंत्रालय आसेआ शुरू कीती गेदी इस पहलकदमी दा मकसद भिक्ख मंग्गने आहलें गी परतियै बसाना ते सशक्त बनाना ऐ। रियासी दियां डिप्टी कमिशनर निधि मलिक होरें योजना गी खीरी रूप देने लेई इक बैठक दी अध्यक्षता कीती जेदे च इस परियोजना दी अगुवाई करने लेई प्रयास गैर सरकारी संगठन दा चयन कीता गेआ। इस योजना च खासतौरा पर बच्चें लेई शिक्षा ते हुनर निर्माण उप्पर ध्यान दिता जाग।

<><><><><><><><>

Mahajan-Gulab

कल अखनूर दे जियो पोता घाट च कार्यक्रम दा सरिस्ता कीता गेआ। महाराजा गुलाब सिंह हुंदा इस थाहर पर 1822 च राज्यभिषेक होआ हा, उनेंगी इत्थुआं दा शासक घोषित कीता गेआ हा। इस दौरान गुरबानी, पूजा अर्चना बी कीती गेई। केई सारे मन्ने-परमन्ने दे लोकें, युवा संगठनें ते सांस्कृतिक संगठनें महाराज गुलाब सिंह होरें गी श्रद्धांजलि भेंट कीती।

<><><><><><><><>

Special Feature 11 Years

11मां अंतरराष्ट्री योग दिवस इस हफ्ते मनाया जाग। आकाशवाणी समाचार योग बारै इक खास फीचर लेइयै आया ऐ जेदे च भारती परम्परा थवां हुन तगर एहदे वैश्विक अभियान बनने बारै दी यात्रा गी दर्शाया गेआ ऐ। भारती संस्कृति च रचे-बसे दा योग अज्ज पूरी दुनिया च अपनाया जा'रदा ऐ जेदे थवां पतंजलि दे सूत्रें ते आधुनिक गुरुएं योग गी अग्गे पजाया ऐ। 2014 च संयुक्त राष्ट्र आसेआ इसी अपनाने ते 21 जून गी पूरी दुनिया च इसी अंतरराष्ट्री दिवस मनाने दी एह यात्रा अग्गे बी जारी ऐ। प्रधानमंत्री नरेंद्र मोदी होरें इस बारै प्रस्ताव पेश कीता हा जिसी अपनाई लैता गेआ। योग सेहत गी बढ़ावा देने, आपसी सौहार्द ते आत्म शांति आहली भेठा लोकें गी लेई जा करदा ऐ।

<><><><><><><><>

Pre Yoga Day Announcement

आकाशवाणी जम्मू दा क्षेत्रीय समाचार एकांश अंतरराष्ट्रीय योग दिवस दे सरबंधै च 20 जून गी 20 मिनटें दा इक खास कार्यक्रम पेश करा'रदा ऐ। एहदा प्रसारण शुक्रवारें बड्डलै 9 बज्जियै 30 मिनटें पर कीता जाग। कार्यक्रम च स्हाड़े परौहने होडन मन्ने-परमन्ने दे योग माहिर ते नेचरोपैथ डॉ. नीलम शर्मा। ओह योग दे स्हाड़े जीवन च महत्व बारै अपने विचार सांझा करंगन। इस परिचर्चा दी मेजबानी करंगन स्हाड़ियां न्यूज एंकर श्रुति खजुरिया। इस कार्यक्रम गी स्हाड़े श्रोता मीडियम मीडियम वेव 303 मीटर यानि 990 किलोहर्टज ते एफएम 100.3 मेगाहर्टस पर सुनी सकदे ओ।

<><><><><><>

Weather

मौसम विभाग नै जम्मू-कश्मीर च औंदे किश दिनें दरान मौसम बदलौंदे रौहने दी पेशगाई कीती ऐ। विभाग दा आखना ऐ जे 20 जून तोड़ी ज्यादातर मौसम खुश्क रौहने दी मेद ऐ पर किश-किश थाहरें पर हल्की बरखा होई सकदी ऐ। एहदे अलावा विभाग नै 21 जून थमां 22 जून तगर जम्मू खिते दे किश थाहरें पर दरम्याने दर्जे थमां लेइयै भारी बरखा पौने दी मेद बुज्झी ऐ। करसानें गी सलाह दिती गई ऐ जे ओह इनें निम्बलें दा फायदा चुक्कन ते 20 जून तगर बरखा पौने शा पैहले अपने राई-बाई सरबंधी कम्म जारी रक्खन।

<><><><><><>